

**Uunga siunnersuut: Takornariartitsinermit, sumiiffinni nunami aalajangersimasuni zone-nut agguasarneq il.il. inuussutissarsiutigalugu ingerlatsinermi aammalu killeqartumik sumiiffiit ilaanni angalaarsinnaaneq pillugit Inatsisartut inatsisaat**

(Inuussutissarsiortermit, Niuernermit, Aatsitassanut, Inatsisit Atuutsinneqarnerannut Naligiissitaanermullu Naalackersuisoq)

**Saqqummiussissut**

**Siullermeerineq**

Inuussutissarsiutigalugu ingerlatsinermi zone-nut agguasarneq ilanngullugu, takornariartitsinermit inatsisip naleqqussarneqarnissaanik nunami siullermeertumik inatsit, Naalackersuisut sinnerlugit matumuuna saqqummiunneqarpoq.

Inatsisitigut anguniagaq marloqiusaavoq. Siullertut inuussutissarsiutitta ilaata annertusiartupiloortup – inuussutissarsiut manna tikillugu inatsisitigut malittarisassiunneqarsimanngitsup – malittarisassiunneqarnissaa pisariaqartinneqannguatsiarpoq. Aappaattut takornarialerineq suli ineriartortoq inatsisip tunngavilersussavaa, matumani qanitarisaani inuiaqatigiit inuussutissarsiummut suli tapersersuinissaasa qulakkeerneqarnissaa ilanngullugu.

Tigussaasumik takornariartitsinermik ingerlatsisut Naalackersuisut akuersissutigisaannik akuersissuteqarnissaannik piumasaqaateqalissasoq anguniarneqarpoq. Tassunga atatillugu attuumassuteqarnissamut, akileraartussaataanermullu tunngatillugu piumasaqaasiortoqassaaq. Taassumap saniatigut piginnaatitsissummik pigisaqartoq sillimaniarnermit pilersaarusiamik immersuissaaq, soorluttaaq taarsiivigeqqusisoqassagalarpat tassunga sillimmasersimassasoq imaluunniit qularnaveeqqusiussaqaarsimassasoq.

Assersuutigalugu innuttaasup takornarialerinermit ukiumut 50.000 koruunit ataallugit isertitaqartillugu, piumasaqaatinik immikkut akuersissuteqartitsinissamik inatsit periarfissivoq. Taamaalilluni innuttaasut takornariartitsinissaminnik annikinnerusumik neqeroorteqarnissaminnik eqqarsaateqartut, allaffissornikkut suliassartai pillugit soqutiginnikkunnaanginnissaat qulakkeerneqassaaq.

Pingaartumik akuersissummik pigisaqartut sumi nunaqarnissaanik piumasaqaataasoq, tusarniaanermi oqallisigineqarpoq. Piginittuunissamik piumasaqaataasup 2/3-imit, 51 %-imut appartinneqarneratigut, avataanit aningaasaliissutinut isumakuluutigineqartoq inatsisissatut siunnersuutitigut iliuseqarfigineqarpoq. Qularutissaanngilarli takornariartitsinerup najukkami aallaaveqarnissaata qulakkeerneqarnissaa, Naalackersuisut

naleqquttuutillugulu pisariaqartutut isigimmassuk. Takornariat nuannersumik misigisaqassappata, takornarialerinerlu ineriartorsinnaaqullugu najukkami inuiaqatigiit takornarialerinerlut tapersersuinissaat aalajangiisuuvoq. Najukkami aallaaveqarnissaanik inatsisitigut erseqqarissumik piumasqaataasoq, innuttaasut inuussutissarsiummut tapersersuinissaasa qulakkeerneqarnissaannut tapertaassaaq. Takornarialerinerlu najukkami ingerlatsisut akuutinneqannginnerinik aallaaveqartumik nunami, nunallu avataani akerliliissutinik qaammatini makkunani ataasiinnanngitsumik assersuutissaqarpoq.

Sumiiffinnut aalajangersimasunut killiliisumik imaluunniit sumiiffimmi angalanissamut piumasqaatissiisumik zone-liisoqarsinnaanissaa, inatsisitigut aamma periarfissaavoq. Avatangiisinut immikkut mianerineqartariaqartunut sumiiffimmi illersuisoqarsinnaanissaa, imaluunniit sumiiffinni aalajangersimasuni angalanissami najukkami ingerlatsisunik atuisoqarnissaanik piumasqaateqartoqarsinnaanissaa, periarfissap taassumap qulakkiissavaa.

Takornariartitsinerup inuussutissarsiutinngortinneqarnissaanut atatillugu suliarujussuarmut, inatsisissatut siunnersuut ilaavoq. Takornarialerinerup nunamut pitsaasumik tapertaanissaanut, taavalu innuttaasunit, inuussutissarsiutilinnit, takornarianiillu nuannersumik misigisaqarfigineqarnissaa suliniutit aallartinneqarsimasut qulakkiissavaat.

Naggasiullugu inatsisissatut siunnersuut, tassungalu oqaaseqaatit innersuussutigaaqka.

Taamatut oqaaseqarlunga Naalakkersuisut sinnerlugit siunnersuut Inatsisartunit oqaluuserineqartussanngorlugu ingerlateqqippara.